

摘藻堂四庫全書薈要

集部

欽定四庫全書薈要

集部

空同集卷九

四至



欽定四庫全書薈要卷一萬六千八百九十五

集部

空同集卷四

明 李夢陽 撰

風雅什

禮社

禮社紀成也今上肇禮于社臣夢陽以戶部員外郎從而賦禮社

元年仲春吉日維戊天子肇修于社式對二后協於百



辟既祇既戒其日丁巳三星彗彗

百辟至止萃于臯門三星在隅乃辟乃閤有滄其雲有
零其雨亦烏蹢蹢于壇之所

八佾剡剡百燎盈庭左金石鑄鼓孔行帝命元臣曰
戎朕代式虔式穆厥維朕載

元臣受命爰肅其躬月出則光三星在中磬管喤喤有
萬斯舞爰配二辟犧尊維俎

於神來格殷殷番番龍旂載揚雷霆喤喤明明對越肅

肅奔走神既醉飽錫辟之祐

適皇績業配天于京三辰允禎曰雨曰暘皇降嘉實來
牟黍社敷文戢戈克紹冢土

禋社六章章八句

辟雍

辟雍紀視學也

天子至止于彼辟雍和鸞央央其來雍雍象輅金衡有
蒼其龍光于廟宮是依是崇

吉日維申脩我元祀皇祝設樂鏞鼓萬舞有筐有篚以
享以祀群執肅肅東德弗渝

誰其觀者三氏孫子其冠我我來听來止翩彼鳳鳥集
于東林繹其觀者其爛如雲

自門徂基辟儼若思青衿濟濟以辟以師爰命祭酒司
業拜手訏哉嘉謀作民元后

帝若曰都戎言式弘匪道何程匪猷曷承載弼元理維
協乃有衆拜稽首天子萬壽

旗旒旆旆淵淵伐鼓皇發辟雍用惠下土自天降休豐
年穰穰藹藹王多吉人四國用康

辟雍六章章八句

甘露

甘露紀異也元年冬至甘露降於陵樹

於辟是興皇用錫祉苞有八業侯茂侯采
填填墉壑有嚴廟宮湛彼露斯既霑既降
湛彼露斯于松于柏是既是掇罔匪澤澤

苑彼陵樹有爛其華盈盈蓁蓁光于邦家
蕩蕩上帝降監在茲維辟時格豈曰匪時
其時伊何厥陽載升爰液乃濡惠我孔明
其昭伊何曰帝攸績靡濫靡僭甘澍斯獲
明明昊天是歆是臧臣作誦言告于萬方

甘露八章章四句

觀牲

觀牲大儀也

赫赫明明天子攸行以修肇禘以對于上帝
天子至止觀牲于郊龍旂交交馬鳴蕭蕭

帝至于郊於赫有臨載穆載欽曰歲事是歆

帝降于圉犧人脫褊羊牛鹿豕僣僣濯濯濯濯牲牲翔
帝之圉其牲孔碩甫甫麇麇

城人伐鼓帝至郊所干旄淠淠虎士孔武乘彼大路八
鸞與與昭于萬邦光于皇祖

觀牲五章三章章四句二章章八句

效五子之歌

五子歌正德年效作

大禹曰咨咨太康女何樂于田十旬弗返百姓離逖女
厥緒用殄洛汭湯湯流于冀方曷歸曷歸我心憂傷
大禹曰咨咨太康敬哉有土毋荼毒下民毋曰民小毋
我崇尊天自我民明威

大禹曰咨咨太康天命難忱慎德者昌維帝克堪奄有
萬方乃罔攸序上帝殛罰女

大禹曰咨咨太康毋遊于盤毋荒于田毋小人是庸嗜
貨靡不顛母曰予一人天下予何天方降爾瘡

大禹曰咨咨太康彼曰不臧是謀是從此曰既經是戾
是戕不念爾祖獨不念爾土嗚呼敬哉敬哉天罔私隲女
五子歌五章二章章九句一章八句一章七
句一章六句

有鵙

有鵙諷也

有鵙有鵙集于喬林征夫遑遑以北以南居人之子我
是用覃

東人之子衣服粲粲西人之子車馬有爛中人之子嚙
嚙衎衎

誰屋室潭潭誰教猷有冠誰遇人艱難誰寤寐永歎
爾視爾友令色令儀弗視爾友靡臧靡嘉爾視爾友予
德予哲背姻背婭罔不愆蔑

朔日日虧十月其雷山川震崩星辰逆行二三君子匪

疾匪疾曰時則然匪我敢逸

燕雀在堂翩翩其羽鱖鱖魴鱖在于河渚弗念弗畜孰
獲爾所小子作詩誨言式女

有鵠六章二章章六句三章章八句一章四
句

青青者蒲

青青者蒲感遇也

青青者蒲生于汙池旗旒有翩君子攸悲

有蕩者道其木喬喬有鳥曉曉女有巢漂搖
有石巉巉在于中泉我思漚嵬畏子不前

青青者蒲三章章四句

有兔

有兔閔獵禪也

有兔有兔其來趯趯有量嬖嬖虞人之縛
有兔綏綏瞻子傷悲豈女有母我子無所
爾粟爾糜爾有狐狸云胡樂而

有兔三章二章章四句一章三句

河之楊

河之楊怨離也

河之楊其葉幡幡子之歸矣誰與我晤言

河之端兮我心惻兮庶見子旋兮

河之楊二章一章四句一章三句

我行

我行思也

采蠶采蠶于彼中野我行思子瞻望伊阻

我有邊有俎滑滑我酤坎坎我鼓反反我舞

有筵有几我有桃李不見子都實維憂矣

我行三章章四句

始雷

雷于辰宜也然懼其弗施也弗威也又弗廣也作

始雷

雷之噬兮西山之陽兮翕兮張兮發坤藏兮闢而昌兮

雷之升兮列缺光兮驅罔象

叶

兮叶劃幽匿兮維民之福

兮

雷虩虩兮民懋懋

入叶

兮施甘雨兮昌下土兮登我稷黍

兮

始雷三章章五句

我出城闔

我出城闔閤水也嘉靖甲申秋久雨水涌陸地行

舟

我出城闔浩浩其流我車我馬登彼方舟昔也長薄乃
今舟之滔滔波塗昔也疇之

嗚呼蒼天雨無其極淤我良田浥我稼穡賣牛買船賣
鉏買楫夕之朝之濟有深涉

彼負者子涉寒號咷彼輦者子陷泥中濤彼車者子馬
顛濡毛彼往來者誰子冠蓋而遊遨

我出城闔三章章八句

河之渚

河之渚送鮑氏也

河之渚鳬鴈與與我駕我車載言送女河水淠淠女舟
淠淠冬十有一月甲申者歲

河之沙浩浩具霜人廬人處子也獨行廬匪不懷茲非
我邦豈無念處旋我舊鄉

舊山有廬溪則有魚有車馬驅有琴瑟笙竽烈風旆旆
寒日冰瀨汝征汝邁

山有栲亦或有栲魚潛於淵或在於沼芻蕘之言君子

敬聽慎爾威儀擇爾友朋

河之渚四章三章章八句一章七句

型範

型範省躬也

器土必型器竹必範綏則有蟬冠則有范哲人畏威爰
矜爰業省之察之春冰是涉

帝命攸畀而胡罔嘉忽心乘之厥玉斯瑕聖戒罔念賢
省日三與則倚之立則如參

淵魚負冰谷鳥嚶嚶賢豈在貴愚匪無榮維彼賢人省躬靡疚彼愚何人外華中垢

型範三章章八句

歸壽

歸壽者李子為東墅子作者也東墅子年六十其子經自大梁馳而歸壽焉於是作歸壽

春日既熙有繁其梅爰啓我堂我尊我壘穆穆其賓揖讓先後介我眉壽飲我清酒

爾生之辰爾子遄馳何以獻之玉斗金卮春華載殷聿
衣襴斑庭樹青蔥鳥鳴關關

又何獻之高高之松翠蕤屈枝盤盤如龍又何獻之維
河之鯉玉簪曜陽金鱗泚泚

歸壽三章章八句

空同集卷四

欽定四庫全書薈要卷一萬六千八百九十六

集部

空同集卷五

明 李夢陽 撰

樂府一

琴操

楚調歌

鏡歌曲

詠史

短調

衛女操

舊說衛有賢女趙王聞其賢請聘之未至而王薨
太子曰吾聞齊桓公得衛女而霸今衛女賢欲留
之大夫曰不可若賢女必不我聽若聽必不賢不

可取也太子遂留之果不聽拘於深宮思歸不得
援琴而歌曲終自縊而死

有狐綏綏兮在彼河梁我欲濟之兮河無航瞻彼故丘
兮淇水淺淺懷我父母兮不能奮翻嗟嗟不能奮翻予
安用存兮

漆室女操

漆室女魯人也倚柱悲吟鄰人問曰欲嫁乎女曰
吾憂國傷人心悲而嘯何言欲嫁乎遂自經而死

父母不聽女言女義不至公門嗟嗟奈何朝倚柱而吟
暮倚柱而歌知我者謂我心憂不知我者謂我求為家
予寧為地上之茂草誠不忍負巖牆而生

慧蛾操

李子中庭而立有蛾窘於爵入檐而避之李子傷
之作此操也

翼之漸漸兮入我檐兮慧遠賊兮信彼黠兮寧爾獲兮
哀鳳操

哀鳳操為漢中張子作也張子三十而天子傷其孤貧無歸也援琴而哀之

鳳之來兮爾胡為兮牛有阜兮雞有棲鳳兮鳳兮何歸傷哉命兮我心悲

月星操

元年冬十有一月其日己卯月在寅位金宿米襲李子見之而憂作此操也

陰陽舛錯亦孔之還斤斤其月有星薄之嗚呼天高高

在上意安若兮

以上琴操

天門開

天門開兮冥冥沛余乘兮上征雷車兮電旗斑陸離兮
四馳陽昭昭兮在下女翩翩兮媵予交不周兮易離路
超遠兮徒自苦涉海兮揚靈揖陽侯兮貝宮采珊瑚兮
嶼間折三秀兮水中望佳人兮不來吹洞簫兮絕浦聊
盤旋兮戲娛時不可兮再有

貽女

龍旌兮玄牡重闕兮紫府夫君兮不可以見女躑躅兮
徒自苦衝風起兮河曾波巖岬岬兮桂蘿折瓊蓋兮貽
女媒不通兮怨嗟若有人兮乘游龍佩蒼景兮御清風
陟帝左兮右降又翱翔兮極中君游兮崑崙又夕宴兮
王母緩節兮永歌紛佾兮繁舞望遥浦兮御舸吹參差
兮愁予

捐袂

捐袂兮沙裔遺襟兮澧浦御重華兮九疑觀潺湲兮容

與神之來兮六龍翳瓊枝兮翠葆驅豐隆兮挾百靈來
如雲兮去冥冥來躡霞兮去乘霓連蜷兮復歲蕤山
之桂兮江之楓雲颯颯兮吹秋風班予馬兮延佇美安
眇兮中渚

懷鄉

伐辛夷兮采芳芷葺荷屋兮蔭蘭渚佳人去兮不歸靈
連蜷兮愁望予涉世徑兮歷險阻駕玄驂兮又文壯歲
冉冉兮既不我留悵懷鄉兮汨夷猶葛藟離離兮石間

雨冥冥兮山之幽旋予馬兮故阿陟堂址兮寡女蘿霜
露交下兮亭臯秋風夕兮洞庭波山何為兮龍從木何
為兮蒙密公有亭兮何不日鼓瑟日鼓瑟兮復吹鰲膽
娛樂兮萬福來

君夷猶

登樓兮送君日盈盈兮將落暖弗鬱乎帶長薄君夷猶
兮吹間並去作巢燕兮既辭又鳴兮噍蛄紛軒蓋兮總總
君胡為兮南都若有人兮被杜蘅帶薜蘿兮蕙纓中有

懷兮荃不知臨修路兮悵天涯悵天涯兮望煙渚信予
美兮誰與龍城兮貝闕君暮趨兮朝謁采芳芷兮江中
寄佳人兮天北

騁望

送佳人兮江渚嫋嫋兮雲氣下鳥翩翩兮戾止蟬暮吟
兮獨苦余遭迴兮隱軫塞中洲兮偃蹇心相親兮口難
言目不覩兮日以遠風濤兮浩蕩涉浦兮騁望蘭被汀
兮歲蕤杜參差兮夕漲君稅楫兮前坻復容與乎中渚

惆悵兮將從瞻淹留兮誰與

雩旱

望君兮曾波雨霾兮兩河驂豐隆兮駕馮夷蹇將至今
風薄之吹笙兮擊鼓絙弦兮會舞君不來兮使我心苦
雲冥冥兮晝晦神靈惠兮甘雨我稷兮我黍穀之兮士
女編龍兮堂墀禽蜥蜴兮水際吐雲兮上下使鳩鳥兮
騰逝紛總總兮神欲下飈為駕兮龍為馬君誰須兮不
來日將暮兮怨思

祀白鹿先生迎送神辭

吹玉簫兮眺帆浦橫蔽江兮美無舸蹇躑躅兮旋望宛
窈窕兮山之左陟山左兮降右忽而來兮倏而去跨白
鹿兮導兩螭色含笑兮心莫知既登兮山椒復南涉兮
石瀨日冥冥兮欲暮風飄飄兮吹蕙帶

右迎神

綠蘿兮紫萸桂生兮羅戶風颯颯兮若有望神驅雨兮
泉浪浪蹀我階兮坐我几以彭郎兮挾匡父蘭葭兮椒

醕日中兮萬舞美孰怒兮飄忽逝雲離離兮怨余

右降神

迹不偕兮心相疑懼雖諧兮愁易離君荷衣兮蕙帶逍
遙山中兮桂為蓋天門兮既闢騰而上兮雲之際石有
澗兮山有峯心相慕兮交不逢稅吾車兮繫馬願褰衣
兮從子

右送神

步虛辭

被霞衣兮芝蓋藹沛騰兮影長帶
晷逖逖兮天門奄周章兮雲際
吹參差兮槃舞燈繁紛兮不歌
以鼓水以陸兮濟鬼福釐泐兮冀望苦

芝山子辭

山之芝兮歲蕤子出遊兮不歸
子不歸兮翳薜蘿寒余獨兮山之阿
山阿兮望子芝爛爛兮莖紫從子兮齋房
帝座兮顯清天門兮不易通子歸來兮
山中石磊磊兮路修日暮兮不我聊

以上楚調歌

雷之奮

雷之奮翕兮張山之陽發坤藏闢哉昌羣龍載浮列缺
光列缺光烜中土惠甘雨介稷黍聖人垂衣民歌舞民
歌舞祛禍蓄饑而食飽斯嬉厲鬼潛滅維福基

鳳之升

鳳之升附龍雲儀萬方昭帝文昭帝文承宗禋安如山
翕如坤兩宮豫協天神帝臨朝奏雲門戛鳴球笙鏞振
昭四方明萬民萬民愉庶物亨陰陽熙乾道成乾道成

皇業昌軼周如纘塗戎臣稽首歌雲龍

月如日

月如日光如輪輪五色纘哉紛貫紫霓揚風翎扶大乙
侵紫庭化為白氣干天經張我弧挾我矢祛祲滅妖天
下理

以上鏡歌曲

賦大隧

賦大隧兒賦隧中母隧外母思啓段段已舉不及黃泉
是何語潁人不來其奈汝潁人不來猶之可俎上分羹

痛殺我

公儀休

園中豈無葵相君奈何饑相君即無衣不愛室中機相
君千萬歲請治相君棲桓公霸諸侯管氏有三歸

青陵臺

兩山當中開露出青陵臺北山雖張羅南山鳥不來我
在南山自有匹馬牛之風豈相及吾頸可斷志不易

射潮引

錢塘八月潮水來蛟龍奮怒濤為雷天旋地坼不可止
此中云有鴟夷子何不張爾弓挾爾矢射殺鴟夷潮可
止君不見潮水年年八月來萬弩射潮終不回

汝為我楚舞

汝為我楚舞吾為若楚歌黃鵠翼成將奈何黃鵠一舉
橫四海君王豈有四海羅君無四海之羅安用此殃君
美人毒君子

博浪沙

博浪沙中挈椎走鴻門
帳前撞玉斗誰謂張良貌如婦
赤帝子起鞭赤龍臣也請歸從
赤松赤松子在何許君
不見朝烹狗暮縛虎

左袒行

陵曰不可平曰可安劉者誰勃與我產不信祿不入軍
右袒計安出

申屠嘉

鄧通小臣敢皇侮錯也何人毀廟堵臣欲戮通帝弗許

請收錯誅帝罔與含血自殲報皇祖

轅下駒

鄭當時轅下駒韓安國兩首鼠禿老翁竟斬汝廷臣不
語淮陽語君不見金家婦王家女一言殺兒還殺母何
況區區老禿且

栗太子

燕燕汝今銜泥向何縣遮天蔽日過長安堆泥作塚高
如山飛來未央宮銜取梁上土黃口見母來啞啞張吻

索蟲哺

赤鳳曲

前赤鳳後雙燕頭岑岑兮尾涎涎組幘郎君夜相見相
見騎白馬驚起城上烏城上烏據巢食兒夜相呼

以上
詠史

子夜四時歌

共懽桃下嬉心同性不合懽愛桃花色妾願桃生核

其二

柳條宛轉結蕉心日夜卷不是無舒時待郎手自展

其三

獨夕玉堦側仰看三星爛畏熱不歸房徘徊夜將半

其四

驚棹出驚流回橈戲清江擘破芙蓉花中有雙蓮子

其五

涼風吹玉樹團扇置不理儂亦有涼熱何況戴冠子

其六

摘葉裏流螢應手葉先落本無牢根蒂虛怨秋霜薄

其七

卽住西水頭
妄住東北許
何能冰遂合
永免風波苦

其八

雪飄悵難行
室邇阻相覓
不畏風色嚴
畏此雪上跡

右四時各二首

車遙遙

車遙遙遙遙
復邁邁望見
秋塵起不見
車輪轉知在
秋

塵裏

幽蘭

幽蘭數紫莖羅列生堂基踰時君不采隔情當怨誰

掌上舞

晨遊憩陽館夕宴戲風臺盈盈掌上舞飛飛素雪迴

以

上短調歌

空同集卷五

欽定四庫全書薈要卷一萬六千九百九十七

集部

空同集卷六

明 李夢陽 撰

樂府二

雜調曲

擬前緩聲歌

萬水東流魚西上游不虞彼有漁子置我於其鉤魚告
漁子汝曷太荼寬大福厚不見是圖魚乃偃僂伸鉤我
脫身以游漁起揮手謝天命各有由此魚銜明珠來報

當日漁

擬烏生八九子

烏生八九子八九子餵飼兩老烏乃在城牆高樹頭兩
老烏拮据為巢心中實毒荼晝夜餵飼八九子八九子
長成各自飛不來顧老烏巢風雨巢漂搖今年有巢處
來年哺子何處所猛虎能食人尚復有子之親螻蟻極
細小蟲奉事長上禮若君臣何得朋友如路人工車逢
所知下車稱別離淚下如雨眼迷離來時不知南不知

北我去何勞問東西車輪班班轉老鳥飛飛啄赤覓

郭公謠

赤雲日東江水西榛墟樹孤禽來啼語音哀切行且啄
慘怛若訴聞者悽靜察細忖不可辯似呼郭公兼其妻
一呼郭公兩呼婆各家栽禾栽到田塍誰教檢取螺公
要螺灸婆言攝客攝得客來新婦偷食公欲罵婦婆則
嗔婦頭插金行帶銀郭公脣乾口噪救不得哀鳴繞枝
天色黑

李子曰世嘗謂刪後無詩無者謂雅耳風自
謠口出孰得而無之哉今錄其民謠一篇使
人知真詩果在民間於乎非子期孰知洋洋
哉哉哉

豆娘子

豆娘子者蜻蜓之細也輕盈側媚羣游而寡忌李
子見之傷焉作豆娘子

汝何者物小而輕盈綽約悠揚朋從寡畏細衣紺裳或

翠具衿或朱而黃嬉戲長莪窈窕水旁餐膏浴滋飲露
吞香才不我知謀寧自臧兒童撲弄姬媵憐傷豆卿子
卿娘子豆娘百卉隕零北風雨霜弱不敵威蚱蜢同戕
肅肅鴻鵠雲海翱翔喊喊者鳳覽輝梧岡微末之蟲何
勞短長

榆臺行

其事在外
治乙丑年

榆臺高高風吹樹梢都搖搖臺下黃羊走黃蒿山頭看
看日落威蕒四面吹軍中白旗身姓誰向前看有河河

水深彼不怕死我亦人力能拔虎尾人虎或兩存歸為
鬼雄榮爾寬

白毛行甲申元旦作

元日地動生白毛發春當暖風蕭騷天時尚然有錯迕
老夫何怪兒童曹君不見猛虎失勢人寢其皮惜也豈
復能咆哮我歌白毛比之董逃

長歌行

籠中鳴望水中鳴一鳴一答汝雖有羽翼不如我汎淥

波食魚鰕奔頻拍藻入煙浦籠中之鴨心徒苦

禽言

泥滑滑車馬不得安何不停車繫馬待泥乾

其二

行不得哥哥東有木公西王婆南面設罾北張羅行不得哥哥
得哥哥

其三

姑惡姑惡小姑刺齷姑不樂新婦早煮餬低聲奉小姑

其四

提壺盧壺提盛酒背母私餉妻妻可再得母恩罔極

其五

瘦兒瘦兒汝為上畱田汝為尹伯奇獨行哀叫心內饑
日逐緣樹啄蟲蟻汝父汝兄寧得知

其六

不如歸去南山豆熟北山有黍

猛虎行

猛虎本居深山我可不入彼來亦難誰令爾今來市中
遊盡日攫人食撐腸拄腹無歇休我欲擊之刃不在手
欲往告秦山之君陸無車水無舟猛虎聞言向我怒我
命在天匪虎懼嗟嗟虎尚有時鴟鴞遺音寧爾知

董逃行

涉江登彼西山下看城郭鬱盤城中閣殿斑斕嘉樹一
何紛綸上有鳴鳥旦暮間關遙望我心浩歎一闕闕寂
闕民生何艱終朝缺突無煙胡彼來往翩翩綺衣車馬

可憐

二解

誰家起樓造天歌鐘舞管喧聞剥羊宰牛列筵

何但一食萬錢倏忽日薄重淵

三解

明燈熒熒爛堂繡幃

雞舌流黃樂人調瑟未央千年萬歲奉觴豈知老至悲

傷

四解

日月逝矣不我留精銷時往霜霰交流繁華零落

山丘心懽意愛為他人收哀哉胡不德求

五解

秋胡行

鸞鳥不可為鵠爾胡不思顏淵掇塵尾見疑我今乃
何敢望聖賢人心中憤悶徒苦悲智見萬里水清終見

底解一高高山上臺彼居者何誰厥狀蜿蜒伺人意欲牽

纏汝雖見其形不見汝情乃胡營營相煎豈不聞我命

在天解二直道古難容樹喬風集顛周公有何疵愆乃為

四國流言伯奇掇蜂不為父憐跡有涉疑惟賢知賢解三

潔色為妒媒危言良見災讒說久自明非時麟聖哀孤

松摧為之薪水東西流欽猶鬼神解四

君馬黃

君馬黃臣馬驪飛軒馭駢交路遠錦衣有曜都且馳前

徑狹以斜曲巷不容車攘臂叱前兵掉頭麾後驅毀彼
之廬行我興大兵折屋梁中兵搖楣櫨小兵無所為張
勢罵蠻奴爾慎勿言謀者來幸非君馬汝不夷

歛歌行

虎狼不可羣日短途路長魚瘠稻復澁蔬芝雞鳳凰
之無恩澤背面輒詆戕鎗銖苟不平持刀起相傷剝悍
復譎詭水土性輕揚哀哉茲土民詠歌以難忘

阪田行

阪田徙離離子母長寒饑昨聞接京軍征夫曷時歸特
生阪田樹下有往與來敝裳四牡雖榮不如與妾共鋪
糜網魚不施網孰能制魚死征夫歸來歸來不見靈寶
公安陸子

豫章篇

晨出南浦橋不見橋上樓但見火燒骨橋下水不流北
風吹枯樹枝無一人來遊妖鳥羣咏鳴啾啾汝何不此
地重起樓吳監大舶來越珍衡舳艫豫章之火心大荼

仙人篇

何者一老翁耳垂兩肩綠瞳方來此芙蓉峰招我同行
聳身即老翁授我玉杵丹攜手遊洪濛東至泰山顛飛
瀑揚膏波清松蔭石關饑當掇瑶草渴飲玉屑泉晨朝
吸沆瀣夕憇若木間俯視九區內傷心淚汎瀾

升天行

九州非我居我思遊冥荒飾輿驂玉虬乘氣切天翔朝
餐發匡廬日暮嵩華陽上謁帝座側回旗拂天閭牽牛

擊河鼓織女方七襄

其二

扶桑躍陽彩海氣騰瑤光六龍抗斗樞九帝開雲閣振
衣躡仙蹤飛轡驂鸞翔仰身操天瓢手勺沆瀣漿朝嬉
太乙館夕憩玉女堂馳情覽八極縱目窮遐荒環運無
恒存逝代多隱傷回旌拂九曜捷步登文昌進謀芝蓋
側待問紫玉房羣靈贈大藥諸御傳神方無惜一粒分
遂令民壽康

洛陽陌

嚴飈卷枯藿霜隼厲秋翩翩
騶馬子意氣亦何赫朝
馳上東門暮徧洛陽陌
臂彎兩角弓寶刀雪花白
借問此誰子無乃漢相如
昔挈一束書今乘駟馬車
虎士爲執鞭縣令皆前驅
傾城莫不歎觀者填路衢
舉手謝鄉人榮耀但區區
丈夫樹名勲所志在唐虞
揚袂徑北去萬里誰能拘

丹霞行

毀譽榮辱至海波何時平
海中有仙山仙人築為城
金銀為室闕桂樹羅階生
鸞鳥翔且舞美女稱飛瓊
幄佺攢我蓋王子左吹笙
踟躕聊戲娛餐芝翫西傾

雨雪曲

冬十一月阻舟徐汭朔風北來
雨雪紛下禽鳥凍寂洲
村肅夜纜夫來言衣單腹餓
波流洄洄促船難駕我心
悽惻羽翼儻假解一七月燠土
今幸雨雪往者難追來春

可沃我雖波阻心則怡懌購
蔬城市貸來逾澤原阪蕭

條雁鴻輯集貧士罔懷一陽環復二解青青者衿涉江我

求大澤寒冥胡子能來鷺鷥難飛潭網頓集網收魚跳

閱忘寢食荒岑險艱豈我能處南紀凍肅返北于工三解

陽鳥篇

陽鳥攸居於渚於野飲咏紆徐行步閑雅我舟觸鷺振
翰若雲飛之有序還集成羣陽生豫知延頸跂望舉翼
萬里雲羅空想

湖吟行

魚游于水游于水而鳥游于水飽之去斯雲昧湖窈冬
序僚僚竟日無人草莽冥寂百怪鳴叫原隰誰主有一
醫夫荒濱守罟疑非恒人問之弗言汝胡者人單到此
間

虎欲齧人不避豪賢篇

吾之於人誰毀誰譽貌失子羽言失宰予知我者天君
子洗心行不愧影寢不愧衾何樹嶷嶷于畛之特有撓
俾鳴俊風者惑漢中黨人宋嚴偽學冥鴻逝豫轅駒局

促非林何棲非淵何潛駟馬憂患貧賤德音富而可求
其從如雲徐子起欽顯者蔑聞

獨漉篇

獨漉獨漉棄田求屋其屋雖大其人則餓小人在旁譬
如螻蛄恩之雖勤葬之則螫歲歲艷陽桃李吐英未曾
結實誰辯苦蜜錦繡圍廁過者掩口珠玉委途宴異塵
土臨淵起輪臨壑振綏人孰不聞亦孰不知綦綯之美
不以爲纈身尊道高名爲雋傑

苦熱行

蘊隆焚如二儀為爐赤曦鑠天塵沙沸途居奚譚袒行
弗擇憇魚伏於困鳥張其喙何物為炭誰乎為工索之
鼓之金流石鎔閭風之顛瑤沼之陰飈輪扇涼冰壑嶽
峯下踏層雪上攀琪樹仙人綠髮逍遙箕踞俯闕人世
溷熱交毒我欲從之安得羽翼

雞鳴篇

雞鳴月落飄風振宇駕鵝曳陸翔鳥雲舉曜靈初出浮

雲翳止驅馬東行條其嘅止

朝吟行

亭毒既周明星有爛義和授鞭九宇將旦寐者欲覺寤
者嘅歎巉巉檜栢覆我中庭雞鳴於顛微霜夜零閭闔
未啓九閩尚扃馳神紫極振珩闕庭

玄熊篇

猛士守四方四方塵不揚玄熊在深山百獸皆遁藏
獵火舉四澤虞羅亘長雲毒矢積如蝟玉石誰能分
二解

熊皮克下御肉亦登君庖豈若犬與豸即死無咆哮

三解

游子篇

游子在他鄉所願親壽考冰犀遊於淵惟願水長好
石雖孤處不羨風中沙葛藟能纏綿不如絲與麻

豫章行

黃河雖大川所嗟源不清千里能一曲不如直道行
王允輔京室李杜垂其名介休巾角折乃為時所傾

析薪

析薪如之何爰以析其理結交如之何相要在終始女
蘿施松柏女蘿千尺長結交不知心結交安得常

其二

列曜垂四隅燦燦冒中土箕星乃好風畢宿復欣雨汎
觀愚哲士戚戚各有營哲夫計千載愚者終一生

以上

雜調曲

空同集卷六

欽定四庫全書薈要卷一萬六千八百九十八

集部

空同集卷七

明 李夢陽 撰

樂府三

雜調曲

公無渡河

盤螭作川梁功奇勢難久魴鱣尾縱縱天吳戴九首

其二

公無渡河河深不可渡中有白石齒齒漸漸兮我我蛟

龍九頭戴角崢嶸峯磕兮水鱗鱗兮衝素波公無渡河
吹沙暮多風河伯築梁結兩螭汝無羽翼墮水中涉水
雖可樂不如登山阿噫嗟嗟公無渡河

空城雀

雙雀下空城穀穗黃離離二雀跳踉鼓翼啄穀穗其朋
千百咸來集小者啾啾是其兒誰者翁嫗被髮曳屨來
打雀雀薨薨飛上城嘈嘈鳴兩人恰欲抽身雀便復集
回頭罵雀辛苦長得禾汝忍飽之我無粒手中乏利彈

又茂網羅天旋日昏奈爾雀何

野田黃雀行

樂樂其所自生禽獸過其故丘悲鳴黃雀游野田焉得
鴻鵠高舉情鳳凰靡世見長生丹山依玉禾白於脂飽
之忽來飛仲尼逢子西乃被接輿譏

石城樂

盈盈窈窕女當門是誰家十三學畫眉十五擅琵琶
中有盧家此女名莫愁向前問此女女聞雙淚流二十

嫁夫郎重門阿閣房臨牕種桐樹五年如身長自渠下
揚州置妾守空樓悔不快剪刀斷水不東流

大堤曲

漢水白離離月落山黑時堤頭石不平走馬誰家兒
住襄門西而在漢水北浮橋不着纜郎詎得儂識大船
何處來落帆向儂許高華白恰子識是真州估

襄陽謠

一灘高一尺十灘高一丈湍急石巉魚何由上棹戕櫓

折俾我心愴順風沿水舉帆十里

白銅鞮

誰家池高陽池日暮歸倒接羅醉如泥汝為誰拍手歌
襄陽兒

襄樊樂

立牆如麻卿來誰家新燕營巢風中滾沙鷓鴣逐鴛鴦
金井石榴黃珍寶丘山積擅名黑門廟

襄陽浣婦行

彼誰者嫗吾家浣衣新寡寒賤鬚髮霜飛體無完衣十
日九饑態度則殊辯是知非嫗泣答言妾襄宮女少小
入宮荷主憐顧四十始出嫁為民婦灌田采薪奄就貧
窶舞裳綻汚形容改故夫死男孺藜藿靡救嫗咽復言
侍襄定獻幾三十年王有義辭皇嘉特宣父子俱覲妃
嬪如煙鈿第載路龍旂飄翩御使絡繹珍車班班漢峴
同清天歌播焉哀烏南還層城言言烏春日妍桂宮有
延傑臣觴壽玉娥奉筵王既捐世變來罔度聞見駭異

古殿寂寞嫗勿更言萬類咸爾厥亦天道安之則已

鴈門太守行

鴈門太守汝何人治邦三月稱明神我有牛羊賊不來
掠我有禾黍人不敢割昔我無衣今有袴著我思禮拜
太守太守不見憐但聞太守身姓邊紫髯廣額聳兩顴
太守出門四牡騤騤後擁皂蓋前導兩麾行者盡辟易
居者不敢窺旁問太守胡所之云訪城南皇甫規

渡河篇

小麥黃黃河波君奈何今渡河昔君游此思君一見經
旬累月不君一面君今渡河乃往何縣跂予望之淚下
如霰汀有鳬兮汜有蘭枝相亞兮居不單人生心事豈
有殫君慎動靜加君餐

黃鵠篇

黃鵠游四海倦言還故邦中路失其雌三年乃有雙鴛
鴦毛羽縟哉工鳳儔鶴匹渠豈同嫵婉歡娛殽酒豐琴
鳴瑟奏芳夜中樂極思來內忡忡驗新追故悲悔叢人

生萬事慎勿輕易狸鼠之能詎逮騏驎車牽美期谷風
興刺我心自知聿斯語誰

煌煌京洛行為曹縣王子賦

時風布陽和韡韡華春木清朝富才賢藹藹冠蓋屬努
力競高路鷄鳴起相逐白日耀飛轡流雲翼行轂同里
多彙薦一門有聯躅蹶彼曹南士雙雙皎如玉聚鳴各
當晨連翩一何急煌煌京洛內濟濟英妙集二郎紳委
蛇三四錦翕熠大郎雖未官俯身拾班級入室談仁義

出與卿相揖聲名既烜赫性行復剛執見者勿徒羨青雲貴自立

南山篇

南山何巖巖上有孤鸞凰佳偶永相失日飛夜悲鳴遺腹生雛哺之良艱晨采竹實暮取琅玕吁嗟哺之良亦艱雛成被九采翱翔覽四海四海觀光儀阿母亦榮輝
我我相公門屹與南山齊自有鸞鳳來綽楔增崔嵬相逢且莫言聽我南山篇

仙人好樓居

津津海中洲峨峨白玉樓上層結浮雲下戴神鼇遊前
簷蔭白榆青龍守門樞上有無始公餐霞煉金腴飛瓊
鼓玄索浮丘扇其隅情閑覽八表出入服氣輿日月跳
兩珠迴旋但須臾萬年永福昌寤言莫相忘

其二

謁帝華蓋側沐髮咸池旁巖巖雲中樓文杏製為梁黃
金走闌干銀闕前相望聳身若輕翼登之窮四洋四洋

北荒沕波瀾浩揚揚九州一何拘欽顏歸洞房屑玉煉
精魄用神無何鄉萬年永福昌寤言莫相忘

其三

乾鵲知來風靈人炳先幾超世構巍峩上與飛雲齊舉
手拂天河白石寒離離牽牛不服箱織女棄支機孤鳥
銜若華東來欲誰詒海水淺以清俯之嗟歎咨眷茲勿
輕道翩翩衆鳩馳萬年永福昌寤言莫相忘

白馬篇

白馬紫金羈揚鞭過市馳萬人皆辟易言是賣珠兒生
長本倡門結交蒙主恩寢食玉榻側獨聆優渥言取金
大長秋徵歌李延年家住十重樓珠簾白玉鈎綺繡裁
襦裳妖艷無匹儔片言即賜第意氣凌五侯

將歸篇

對面有平絕千里長相思登高望來車入門賦將歸驚
風何飄飄獸兔芥間啼羣鳥各有趨他鄉難獨依獨依
令人惑悠悠浮雲馳悠悠尚可道霜露隕百草

答客

子去有何見來之奚所聞願客且寧坐為子請敬陳丈
夫志四方出門轍同輪人心投合諧匪必鄰里親長風
會枯蓬飄飄逐飛塵既東忽復西聿誰究其因引觴就
歧路有懷庶能伸

擬燕歌行二首

花稀葉豔蘼蕪芳皇皇溥原修且將陽浮野曠雲飛揚
風沙眯目燠氣黃禽獸阻饑孤在梁興言送君還故鄉

牽袂欲別立徬徨
延視極騁中自傷
締交心違隔肝腸
爾去孰予共杯觴
蘭橈桂柂文荔牆
逝哉汗漫凌洪洋
安能假翼東南翔
何人贈君紫玉璫
又何贈之雲錦裳
永言嗣茲無我忘

其二

銀河耿耿秋夜長
牽牛織女限河梁
終日弄杼不成章
延頸北望涕沾裳
自君別我之他方
錦衾燦兮獨空牀
北風發發天雨霜
鴻鵠垂翅不能翔
谿谷天寒林樹蒼

道路欲歸多虎狼人煙斷絕乏資糧為君憂愁斷肝腸
思策良馬逝君旁中道失路河無航攬衣踟躕夜未央
願為浮雲歸故鄉

芳樹二首為上海陸氏賦

陸出東坡故硯姑蘇全肩筆索予面賦一字起十
字止

嗟天運春奄暮翩翩者鳥集于芳樹芳樹生路隅車馬
一何多朝看桃李花夕看桃李柯爰登高丘以望遙見

長安綺樓樓中美人彈瑟如聞三歎未休客乘白馬繫
樓下秉燭置酒娛夜遊美人贈我錦繡辭把玩不異珊
瑚鈎林陰溥露羅袂溥明月照闥那可留嗟乎人生何
不共努力君不見城鴉哺子忽生翼

其二

前缺八字句此篇足之

倚君子道為貴貪夫所欽駟馬高蓋東家雖推牛不如
西家壘雖有丈馬千駟不如西山啜薇倚嗟富貴良何

為瞻彼青青兮陌上林穠華灼灼兮一何早涼風有時
漂搖來吹汝坐見淒淒白露滿芳草願采青松寄情親
於遠道

鳴鴈行

鴻鵠高舉摩天飛渴飲沆瀣餐靈芝翅拂日月雲為衣
即有矰繳安能施下遊滄海高河漢我思與爾時相見
羽短毛長何足辯

知足吟

衡門可栖藜藿可飯錦綺雖麗韋布自暖車馬雖貴豈
若仰偃下覽林臯上陟巒巘靜倚垂虹憇目送行雲返
直如絃

直如絃死道邊相逢且勿誼敬聽古人言子雖抱良璧
暗投誰為惜拔蜂尚見疑何況不相知種桑為得衣種
穀為得飽結交不得心不如絕交早

采菇曲

衆星欲沒月模糊人家河上起相呼相呼相喚采秋菇

問渠早起緣何事此草日出化作田中枯采菇采菇君
早歸霜寒露重濕人衣藍田白玉非無種不似商山好蕨
薇

其二

白如白玉簪香如玉田禾行人且莫行聽我采菇歌儂
家住在黃河曲一日波濤怨殺河河來有魚去有麥麥
下秋霜菇菜多不求河向城南去只願年年河不波

雙燕篇

雙燕來故室不見阿母語穿牕入幕尋阿母哀鳴欲棲
還復舉喃喃止翠桁徘徊拂素幃浮塵積玉玢斷蘚生
畫衣雙燕年年春社來阿母阿母何時歸

賦得古別離送龍湫子

盈盈楊白花汎汎綠波水化為浮萍草乃與人相侶飄
泊無根蒂隨風任流止今日歡聚客明日倏千里千里
異鄉縣有時復相見心情豈固殊所嗟形色變一見復
一別少壯頭盡雪老大未足傷願言崇令芳

史烈女

史烈女者杞史氏之女也未嫁而死其夫是踰禮
以守信破經而成仁者也李子曰史氏女有激俗
之功焉然予聞其言矣於是乎述

梨花如雪霜鴛鴦不成雙我心明如鏡我心清如水鏡
明有塵時水覆無收理古昔華山畿行人下馬拜春風
兩蛺蝶綠草搖衣帶

孤鵠篇壽程生大母

有孤者鵲毛羽蒼靈氣勃勃吞秋霜饑餐玄圃禾渴飲
瑤池漿朝從金母遊夕挾飛瓊翔生有二子二子生八
雛雙雙崑崙之巔漱芳茹膏飧玉腴上下嬉紫虛青鳥
為伴文鳳俱俯視鵲鴉鵲鷦鷯何啻萬萬輩啾啾啾啾
腥穢

以上雜調曲

空同集卷七

欽定四庫全書薈要卷一萬六千八百九十九

集部

空同集卷八

明 李夢陽 撰

樂府四

雜調曲

古調歌

塘上行

蒲生何離離過時采者稀莫言采者殊盛衰自有時

解一

昔與君相見不謂行當變讒言使交流水清石自見

解二

孔雀東南飛十步一徘徊羅鷺羽翼短安可作雄雌

解三

今日樂相樂飲酒行六博蒲生枝葉多中心亦不惡

解四

艷歌行

晨日出扶桑照我結綺窻綺窻不時開日光但徘徊

解一

通阡對廣陌柳樹夾樓垂上有織素女歎息為誰思

解二

步出郭東門望見陌上柳葉葉自相當枝枝自相糾

解三

甄氏女詩

予讀魏記見甄氏女失身以讒被誅即其絕鳴之

音至慘戚不可讀而竟以讒死悲夫然卓氏女亦

奔相如作白頭吟何所遇懸絕也陳思王浮萍詩
或稱託風於甄氏比之長門成敗異矣豈非事人
者之永鑒哉

種樹高堂下枝葉何留留辭家奉君子置我青雲樓一
朝意乖別棄妾忽如遁昔為同溝水今向東西流獨守
結心脾夕暮不垂帷明月鑒玉除清風一何悲曳綯立
中庭仰見明河湄明河光不回念妾當何依沉思仰天
歎淚下如斷縈

師曠歌二首

詳見樂書

宮筵肆兮哀絃拊玄鶴降兮鳴且舞呼煙侶兮嘯雲友
誰能為此師曠子

招白雲兮會天鬼雨冥冥兮風不止君好音兮徒自苦
民悲嗟兮離棄女

五仰詩五首

余懷五嶽尚矣婚嫁未畢頗有向平之歎太史公
曰高山仰止景行行止即未能至心竊向往之於

是作五仰詩焉

我所仰兮在華山側身西望阻秦關蓮嶺阻修徒離歎
仙人贈我白瓊丹翳三秀兮吟葛覃我欲從之途路艱
西望咸陽涕潺潺

其二

我所仰兮在衡山側身南望阻荆關祝融峯亭心悲酸
仙人贈我赤瓊丹婆娑挂樹山之間我欲從之途路艱
南望洞庭涕潺潺

其三

我所仰兮在泰山側身東望阻齊關南有龜蒙東肅然
仙人贈我綠瓊丹招我東游扶桑間我欲從之途路艱
東望河濟涕潺湲

其四

我所仰兮在恒山側身北望阻燕關飛石岑巉不可攀
仙人贈我黑瓊丹帶星辰兮佩鳴環我欲從之途路艱
北望鴈門涕潺湲

其五

我所仰今在嵩山側身遙望阻韓闕企余望之良匪難
仙人贈我黃玉丹手持金光翳華管我欲從之途路艱
遙望緱城涕潸潸

淋池歌

翩翩黃鵠玉距金衣飛引兩雌來下我池肅我徒駕我
舟折荷花兮擢中流女揚歌龍豹馴陽阿雜進齊謳陳
會鼓擊樂未央皇家萬壽民阜康

招商歌

荷為蓋水為車女豔豔兮繡帶舒辟陰館坐陽渠招涼
風兮吹玉筍吹玉筍感心志晝卷夜舒蕩人思榮景沉
凝霜零仰首太息沾我纓

順東西門行

慨人生七十稀來日苦奔去難追賢子孫富家資耳聰
眼明心寡悲酒既清散核時首春禽鳴梅滿枝人道成
世運熙乃今不樂當待誰召同姓請鄉耆鼓瑟飲醇祝

期頤

妾薄命

蘭房宵宴燭舒明
今者不樂歲其征豈伊異人惟友生
金杯玉盤殽雜呈
恃容驕愛各極情
任心屬懽密意傾
美人顧予獨目成
烏履雜蹂香澤傳
額瞬目語中意宣
主稱千壽客萬年
攬衣起舞體仙仙
燕翻雪迴臻極妍
羅濡穀潤汗沾顏
履遺珮絕立未安
滿堂稱能燈屢前
金爵弱腕未勝持
相擎袖遮情語微
促尊前席影齊移

繡裾珠袂光逶迤耳後懸璫何累累皎若芙蓉出綠池
贈我彤管親所將車疑馬停乃罄觴德音愛深結肝膈
醉沉獨言猶不忘歸室自解鳴玉鐺九華流蘇雞舌香
合眼宛在君之旁覺來微月鑒空牀起視北斗長闌干
踟躕露晞日上山義成愛施良獨難悲思歎息淚沅瀾
佳人絕代惜玉顏情會恩離摧我肝願託錦衾終此歡
苦哉行

從軍北到長城長城草枯窟不平十月風發霜霰零人

鬚馬尾冰結成東歸太行踐羊腸斫冰煮糜巖谷旁攀
枝掩淚瞻故鄉紅顏搗素怨夜長悲離恨阻斷肝腸破
鏡何時飛上蒼

嗟哉行

人言高樹多風羣鳥巢其顛勁幹從來易折弱者永其
年蘭茝雖異衆草秋至同一零君子不愛其身身屈名
乃成

朱榴篇

金方... 卷八
朱榴雖擅名不與衆草爭春陽炎天衆草死朱榴吐豔
何揚揚縹緲攢葩不結實可憐此物終拋擲

行路難

錦筌翠蛾心莫疑色銷言忤情遽離偶投響諾山嶽移
背面詆訾孰復知川塗憂風備其舟彼風東西流波翻
浪側時不休泊船倚岸纜樹根彼何者鳥翻然喧願置
此曲令心煩

白紵詞三首

鐙繁月明夜何長華桂鳳髻曳鳴璫
裊雲流影歸洞房
引商刻徵斷人腸
金鞭騶馬立徬徨
解衣酣酒歌未央
夜闌雞鳴不下堂

其二

天河為橋一水長
雙星怨夜遙相望
玉簾金茀衢路旁
塵暗鐙殘芬秀揚
轉眸明月低西方
墮靨流鈿飄碎光
馬停車駐空斷腸

其三

金
五更月微含素波飛霧英英沒絳河桂宮蘭室棲玉娥
外極金鰲萬象羅萬人齊和一人歌生丁福運民太和
竟日為歡豈足多

以上雜調曲

河之水歌

河之水歌李子為其子作也以子追不及

河之水流濺濺望父不見立河干

河水漉漉舟子搖櫓東方漸明我不得渡

想像歌

李子北行日夜行思其兄其兄亦日夜行於是作
想像之歌

霧邪煙邪行草莽者兄邪

雞鳴歌

雞鳴歌者李子去江西而作者也孤舟泝江漢而
上

東方白兮雞鳴膠膠鼓予櫂兮沙之坳明星上船桅北
斗入地離離蘆中人逝而逝而

內教場歌

內教場歌者李子紀時事而作者也帝自將練兵
於內庭

雕弓豹韃騎白馬大明門前馬不下徑入內伐鼓大同
邪宣府邪將軍者許邪一解武臣不習威奈彼四夷西內
樹旗皇介夜馳鳴砲烈火嗟嗟辛苦二解

叫天歌

叫天歌者撫民之所作也余聞而悲焉撮其詞而

比之音

彎弓兮帶刀彼誰者子逍遙牽我妻放火我言官府怒

我一

解

彼逍遙者誰子出門殺人騎馬城市汝何人誰教

汝騎馬

二解

持刃來持刃來彼殺我父兄我今遇之必殺

此僮彼答言奉黃榜招安嗟嗟奈何奈何

三解

彼不有官

饑官賑之出有馬騎我有租有徭有役苦楚胡不彼而

四解

招安歌

鷹饑則附我父順子逆子右父左彼則萬只誰曰千只
彼烹牛美妻尚望樵山而秉犁

賊逃歌

戈戟團團鳥飛不過汝安逃兮毒弩蛇矛乎林之坳兮
君不見青衣來狼兵開

愍災歌

火之發兮城南暮飛城入兮勢衝礮急風逆不反我
心怛兮怫兮汨兮安得術嚶爾滅兮

解一

省之火自門

二解
徂堂燒兩廊兮彼何樓者裂棟爆瓦天為赭兮烟噴
噴海湧照四野兮嗟何鳥聲怪而赤焰翔而不下兮

慙嘆歌

東湖為陸而我無車有舟灘高水淺行不得以舒倉浪
天疾威我人七月不雨田龜坼山而鱗鱗夫兮出殺賊
婦哭于廬疇給我食

姚源歌

嗟岑岑是何岑攢兮下則無底之壑血漉漉兮猛獸
食人岑岑禽鳥竦峙鳴鳶不可以為鳳枉爾飼兮我聞
不敢以言舉火來白刃帳下離哉翻縣官走前奪驢後
叫狗

欵乃歌

五更風打頭來兮嗟嗟欵乃船開努力齊兮欵乃力把
柁立兮欵乃努力上灘水平平緩兮欵乃北風雨雪吹
我寒兮欵乃日漸漸冥兮誰濟此川欵乃

和方山子歌

餞者在郊黃鳥交交楊柳蔭車有酒有肴

僕夫歌

何柳不黃何鳥不鳴匪無良朋懷我故鄉

答歌

春水渙渙水鳥鳴喚追汝者誰白馬在岸

舟子歌

食君琅玕佩君玉環春蒲再芽北舟我還

答歌

已哉辭

由衷醜貪孰之廉兮餐冰茹蘖乃疇若汝節威武不屈
以身殉國此戾此賊彼毅彼力曰伊逮之逮之膺矣已

哉天乎命乎詘予改之吾曷懲矣粟滴漑望首陽之清
泉兮有二人者從之汨乎終予年

三原王公壽辭

軒冕兮巍哉公之進兮羣龍委蛇公今何所兮南山岩
嵒誰與公兮逍遙

南山何有兮其雲油油出覆四海兮歸抱一丘公朝攀
兮暮與游徜徉宇內兮復安求

綠桂兮丹阿公遊兮酒歌幅巾兮鷺羽婆娑兮公舞壽

且康兮慰我民望兮

招隱山辭

山之桂青青秋風綠葉冬不零王孫幾時歸山空蕙草
摧

山之草萋萋春風花發桃源迷子規啼竹陰日暮愁人
心

秋之夕螢飛山風霜露沾人衣洞門翳寒蘿奈茲華髮
何

以上古調歌

空同集卷八

欽定四庫全書薈要卷一萬六千九百

集部

空同集卷九

明 李夢陽 撰

五言古一

時命篇

代馬不戀越荆禽豈巢燕鸛鵒渡汶水君子憂未然柰
何客游子率爾辭故山行獸顧丘林出雲有歸還交交
聲利途軒車日駢闐誰念牛下人悲歌夜中歎豪門有

棄襦我衣恒不完張儀懼諸侯泄柳乃閉關貧賤豈盡
愚時命當自安

述憤

弘治乙丑年四月坐劾壽寧侯逮詔獄

天門鬱岌堯虎豹守其隅番番九苞禽頡頏舞雲衢銜
書奏至尊青龍與之俱光夕絕還響徙倚空愁余

其二

帝居杳何許蒼蒼隔九閭白玉為阿閣黃金為重門可

望不可叩仰見飛雲奔何當發炎旭下照孤葵根

其三

韜響久不作烈士常苦辛魏裾已寂寞漢檻空嶙峋
焉向千載習習懷斯臣皇心苟識察百死寧一身

其四

懸車曜回景夕風起喬林撫茲散沉憂浩蕩開重陰迴
翔瞻闕門躊躇思玉音宵坐焰明燭懷古傷我心

其五

大化罔不虧人生固多艱汎觀疇昔人浩然發憂歎自
非餐霞侶伊誰駐朱顏律律南山岑拂衣會當還

其六

孟夏草木長垂雲一何淒零雨宵始歇西山朝復隳兀
然坐高春時聞鶉鳩啼逢辰寡宿懽履運傷前迷既無
杯中物何以寫我悽

其七

飄風自南來颭颭入我懷我欲隨之翔北向三重堦守

闍遙望余閭闔何由排戚戚勿重陳危言多厲階

其八

夕雲鬱崢嶸頽陽入西丘返景漏林端明我屋上樓靜
久得玄理源澄復何求永懷鄒陽子聊以抒我憂

其九

苔井肅陰森嶽廟閔以清車前當路翻紅葵夾階生羈
人散煩疴紆徐步中楹時禽變好音庭柯敷夕榮詎知
沮洳場曠然獲悠情

其十

青青廟中槐交交一雙禽為巢育其兒結構良苦辛一朝驚彈羅移棲向高林我行適見之歎息空彌襟

其十一

湫宇夕陰陰寒燈焰不長氣樓遞微明飄忽如清霜人云網恢恢我胡寓茲房墉鼠語牀下蝙蝠穿空梁驚風振南牖徂夜倏已央於邑不成寐展轉情內傷

其十二

小草生枯桑芊芊競芳辰雖云殊本根寄託各有因自
我罹幽囚忽焉經浹旬我兄千里餘渺渺長河津妻子
日望余蒼蒼隔西鄰所幸二三友笑言越昏晨宵鐙促
燕膝昵語忘苦辛患難苟相得毋論骨肉親

其十三

檐月何徘徊晨風復依依載言別同居倉皇倒裳衣處
者各惆悵去者從此辭挽手刺刺語寄言家中知丁寧
故與親願勿長相思明明昊天威我久寧在茲

其十四

皇矣彼上帝赫赫敷明威四序舒以慘中有玄妙機燭
龍躍天門一朝景光回昔為霜下草今為日中葵稽首
沐罔極欲報難為詞

其十五

明月出東方徒行反家室室人走相訊問我何由出明
知非夢寐欲辯仍自失喜極雙涕零轉面各銜恤垂鐙
照絳卷浮埃滿朱瑟愁言卒未傾忽復見晨日

其十六

鳴鑣踰廣陌執簡謁彤闈
道逢相識問倏如遠行歸
虎拜閣門下龍顏霽晨輝
二后邈以迢吾皇嗣其徽
從諫如轉丸旁求炳先幾
令聞洽四國壽與南山齊

其十七

臣本草野士弱冠承恩私
黽勉簪紱間低回報容姿直
湍寡回波勁木無弱枝天運
不易測物情諒如斯修塗
方浩浩駕言赴前期

發京師

正德二年春二月與職方王子同放歸田里

驅車彰義門遙望郭西樹冠蓋耀青雲車馬夾廣路威
風何赫奕各蒙五侯顧回飈動地起白日倏已暮棄擲
委蔓草榮華若朝露良無金石交人生豈常故絺綌足
禦冬誰念紉與素愜彼白華篇氣結不能愬

其二

鳶蘿附松柏枝葉固相因行子戀儔匹況遇同鄉親北

風起河梁日暮多飛塵攜手同車歸駕言西適秦道遠
長渴饑客子懷苦辛仰瞻天漢流夜永不得晨驂馬媚
其曹鳴鴈各求羣明星出東方照見車下人夙興即往
道登彼高路津還顧望京邑愴焉何所陳

離憤

正德戊辰年五月閤瑾知劾章出我手矯旨詔獄
采采河邊蘭鯉魚何盤盤念我同胞人訣絕摧心肝事
變在須臾浮雲逝無端臨發路踟躇誰敢前為言原鵠

抗高聲我行何時還十步九回頭淚下如流泉

其二

練練晨明月鬱鬱風中柳蒼茫遮我車識是平生友感
君故意勤贈我雙瓊玖虎狼夾衡軛狐狸草間走東方
漸發白聊歸勿為久天威煽方處君子必其口

其三

北風號外野五月知天寒海水晝夜翻南山石爛爛丈
夫輕赴死婦女多憂患中言吐不易拊膺但長歎永夜

步中庭北斗何闌干裂我紅羅裙為君備晨餐車動不可留佇立淚汎瀾願為雲中翼阻絕傷肺肝

其四

驅車重行行前上西山陞白日忽已冥歸鳥來何遲飄風吹征衣北逝方自茲行路見我行不行為嗟咨苦稱途路溢君子莫何之欲訴難竟陳天命自有期

其五

結髮事君子締結固不解青蠅玷白璧馨香逐時改恩

阻愛不周棄擲良在此紅塵何冥冥白日淪西海對面
有訣絕何況萬餘里得寵各自媚誰為展情理訛言方
蝟興君子慎其始

七哀詩

問客何方來四月發回中繁霜隕百草樹木如寒冬客
行一何遙客顏一何憔悴舉目望關山關山鬱蕭條少壯
盡垂邊崖谷何寥寥戰馬不解鞍弓矢常在腰碩鼠走
空倉城上狐狸跳咄咄勿復陳更問北來人六月天雨

霜哀哉生不辰

與客問答

門有萬里客顏面帶風霜左右佩雙鞬意氣何揚揚問
客何州士逝將之何方客亦不顧云但言開中堂手持
一書札口口稱故鄉長跪受書札草字八九行上言親
戚故下言別離傷

其二

長跪牽客裾故鄉今何如客迺長跪言故鄉不可居墳

隴既蕪沒寧復識田廬鄰巷鮮故人族屬半丘墟巖巖
高山谷今為官路衢主人聆客言涕泗交連如離鄉三
十載小女為人姑適者日以親遠者日以疎狐狸知故
穴牛馬知故陸願為連理樹託根北山隅

赴江西之命初發大梁作

戚戚辭故里盛陽遠行游入門揖兄嫂征馬已駕輶日
午登前岡浮雲逝南流零汗透衣巾僕夫行悠悠軀微
懼命重慷慨但懷愁還望故所居匹鳥鳴相求而我獨

何為道路常懷憂

轅駒歎

世徑互險夷富貴安所需昔為櫪中駿今為轅下駒
白日仰悲鳴青雲立踟躕未蒙主人顧何由効馳驅
朝思碣石津夕睇流沙隅常恐侶凡蹇棄捐中路衢

李廣

李廣昔未遇射獵誰見稱君王猶未識他人寧不輕
日從田間飲夜止灞上亭醉尉前呼呵小吏亦見凌
一朝

剖郡符飛蓋赴北平
凭軾覽百邑樹羽寧
千城亭障不設燧
櫪馬躍頓纓彎弓射虎歸
淡淡黃雲生自從結髮
戰舍鏑無虛鳴威懾五單于
胡人寤寐驚孰知身運乖
數奇竟無成壯顏逐年衰
白髮忽見嬰寄言雄圖者
俟命莫吞聲

豫讓

士有氣相感殺身酬所知
伯氏既謝世族姓無孑遺
噬炭甘若飴漆身亮何為
生既荷君遇沒敢求君知
仇聞

再三歎攬淚惠新衣玉劍四五動左右神為摧愴哉彼
流水迄今為鳴悲行路佇歎息芝蘭繞墳基人生固有
畢節義誠難虧

怨歌行

怨違情有悲懽聚理無欺懽怨非中則感離難重持纔
見春華交倏已晨露滋秋風吹羅袂團扇不復施團扇
與羅袂用舍各有時炎寒啓迭運超曠多遠期勿徒歎
捐棄恩愛倘中移

葑菲歎

菁菁田中葑與與疆上菲托根豈誠異敷葉為誰美采
掇女心歎遵路勞情理鮮莖入素手終朝不盈筐置之
獨長惋投淚沾衣裏白華肇卑薄谷風啓怨誹色衰使
交離棄美因下體空瞻寸晷旋倏見嚴飈起徒持履霜
戒誰念禦冬旨吟歎非貞喻托物聊在此

有夢

濡迹古梁郊託茲洪河疆流景逝不處衆草忽已霜玄

雲駭崇原鳴風激空桑侯子竟此夕念獨涕沾裳人欲
天必從神交詎無方解襟即幽寐執袂奉顏光道睽未
終已舒體各異鄉鳴雞在東壁薄月鑒空牀精誠諒有
合暫違寧詎傷

馳景篇

小至方浹辰居然屆寒臘澄空暮霜斂雲物恣吐納眷
念河關阻悵望三川楫城陰多悲風馳景杳難接遙憶
鹿門駕緬軫馮驩鋏

時序篇

邈矣時序邁悠悠羈思懸少歲覲飛龍振步躡雲烟揚
芬凌紫霄結駟覽黃淵王綱祇以穆四海屢豐年晨趨
謁雲陛晚沐踏京塵流觴擁華館藻翰飛陽春逸者眷
多暇壯士恥無聞徒閱芳華改何有尺寸勲日月不我
待倏忽星運移抱疴屆茲夕憮然傷夙期玄髮難久恃
母令達者嗤

歲晏行

歲晏幽陰積寒霖夕館空浮雲起城闕浩眇安可窮悠
揚橫太虛回薄蔽鴻蒙我有一叢蘭種之良亦難飄風
忽來吹零露苦相殘勸君留此草蕭艾不可寶

苦熱篇

大運互伸縮二儀每驕蹇陽威苟不烈陰馭何能反避
暑躡清榭拭汗望幽巘密綠暎豐林萋蕪萎脩坂逃飲
豈其性對食不能飯嗟彼馳騁子晨暮各忘返執熱古
有經愚智詎相遠何當蘇海宇余亦遂仰偃

其二

伏陰會當升愆陽固可期
牆茨覆鮮實蟪蛄夕以哀
所虞大火流即值涼霜催
軒轅製六律大舜彈鳴絲
四氣為之和民生寡憂思
古理日云邈季運安所師
我懷良已永炎曜況倭遲
願言惠清飈颯然均此施

值雪詠懷

索居倦晨暮沓沓傷歲窮
玄雲為誰屯流霏夜常風
映隙既窈窕穿窗亦玲瓏
凌高似有綴填卑忽若崇
裒多

雖稱物益寡竟誰功匪無盈尊酒斟酌解我忡途路悵
伊阻佳期杳莫同握瑾惜楚老投瑤怨國風人欲天必
從精感理能通鍾絃曠易絕郢調寡彌工持為知音說
庶以折其衷

苦寒行

白日斂光曜北風如劍刃澤堅走鳴車冰雪峙千仞登
高望四海四海水將結蛟蛇壅巢窟虎豹潛於穴巔岼
太行谷蒼莽陰山戎沙磧晝飛霜壘門吹烈風鳥雀墮

巖壁黃狐嘯空城居人掩關卧客子無復行

行省樹下

中林溽雨積蕪徑暑日薄衆鳥集于樾鵷風眇焉託披
雲矚岑觀縹緲三阿閣踽踽懷昔賢擾擾疾棼錯夷猶
攀榮柯慷慨念幽壑

卧疾

寒飈振疏牖十日歲華改王孫怨脩路芳草若相待寸
心百慮嬰移疾屢朝晦范甌蛛網生翟門雀羅在歎息


中林蕙望望何能采

其二

眠疴感歲晏中意長刺刺展策不能讀對酒寡懽懌晨
風激幽林堅氷滿川澤短景不可駐倏忽變昕夕飛雲
迅南征歸鳥厲其翼地北常苦寒寤寐想溫域



空同集卷九



總校官庶吉士

臣

侍

朝

校對官庶吉士

臣

陳崇本

校對官編修

臣

閔博太

膳錄監生

臣

王詔

膳錄舉人

臣

嚴巖